

欽定古今圖書集成

方輿彙編職方典



欽定古今圖書集成方輿彙編職方典

第五百二十七卷目錄

鳳翔府部藝文一

萬年宮銘 并序

唐高宗

醴泉銘

魏徵

九成宮東臺山池賦 并序

王勃

禱雨磻溪文

宋蘇軾

鳳翔太白山祈雨文

前人

喜雨亭記

前人

鳳鳴驛記

前人

凌虛臺記

前人

周公潤德泉碑

元孔克仁

重修太王廟記

明郭仲南

君子亭記

張應福

古槐記

前人

愛蘇亭記

陳棐

石門記

楊博

終南太白說

前人

褒斜同谷說

前人

鳳翔府部藝文二詩

大雅絲九章

詩經

武溪深行

漢馬援

扶風歌九首錄七首

晉劉琨

扶風歌

宋鮑昭

朝天嶺

唐盧照鄰

初秋九成宮應制

劉禕之

奉教追赴九成宮途中口號

李嶠

古風

李白

登太白峯

前人

九成宮

杜甫

勅借九成宮避暑

王維

赴北庭度隴思家

岑參

岐山下

二首
錄一

韓愈

代扶風主人答

王昌齡

三良塚

柳宗元

九成宮

李商隱

汧陽縣閣

韋莊

懷賢閣

宋蘇軾

東湖

前人

遷內翰給假回眉過鳳翔遊大像寺

前人

斯飛閣

前人

自寶鷄陽平至斜峪宿蟠龍寺

前人

遺愛亭

元魯懋

五丈原

明何景明

君子亭嘉蓮

朱圻

鳳凰泉

王麒

天臺山

劉嶠

鳳臺山

吳琮

寶鷄縣

汪廣洋

職方典第五百二十七卷

鳳翔府部藝文一

萬年宮銘并序

唐高宗

朕聞金臺迢遞超忽崑閬之間玉闕參差綿邈蓬瀛
之際是以周王肆轍唯招既往之僊漢帝遐遊空益
將來之弊豈知岐陽峻阜鎮茲京甸疏林光之列館
建甘泉之離宮東望翦華千林結影西瞻隴阪派水
分流南俯茶原風雲交映北臨石柱川岳朝宗迴迴
孤峰秀三襲於霞表斜斜危路環九折於雲心復澗

古今圖書集成
澄陰扇炎風而變冷重巒潛暑韜夏景而凝寒故知
五鎮之基空號神州之地三仙之嶺虛傳靈府之都
未若翦石裁宮構飛檐於迴漢騰虛架宇聳紫殿於
遙空百仞朱樓月盈虧於青瑣千尋翠閣雲舒卷於
丹墀岫綴霞衣點虹梁而散錦巖飛溜帶瀆石砌而
飛珠浮涼氣於彤闈庭畱花而雪夏凝清陰於碧沼
池結鏡而冰春泉起花岑沁數峰而吐秀波搖錦石
咬兩鏡而騰暉幾片斷雲縈松合蓋數藜幽桂極月
分香溟壑棲煙叢千疇而散碧朝原旭日輝四野而

舒紅笑樹餘花低空落影吟風宿鳥響苔雙嬌鸞不
恨而靈啼蝶無情而起舞朕感懷千古流鑑百王思
欲屏逸收驕怡神遣慮崆峒訪道欽往哲之高風姑
射尋真挹前修之微步所以停軒禁籞駐蹕榆川非
欲賞恣盤遊途窮轍迹加以時侵首夏汎蕩餘春露
泣修篁風清邃澗薜蘿雲起藤葛星懸可以陶瑩心
靈澄清耳目鏡冰霜則廉潔斯在撫松筠則貞操非
遙昔姬后西征猶刊弁石秦皇東指尚勒稽峯况勝
地追遊何必華胥之國蕭然物外不假元圃之阿故

以叨美千齡騰輝萬古景其前躅爰紀茲地其銘曰
靈山作鎮結秀岐陽遠圖石柱迴攄瑤房鸞驕淑氣
花泣韶光樹含冬暖巖畱夏霜構宇重巘裁基疊岫
石砌被錦山窻點繡闕小蘭新峰殘蓮舊雪徑累花
冰溪恆晝標途天外聳闕雲端煙霾邃谷霧失鳴湍
闕七字

滿彤闈潛暑翠幌凝寒憩駕離宮

淹畱禁苑柳初眉細潭深鏡遠蓋逐雲穿苔隨闕二字

葉冷帷秋闕濃闕晚泉飛嶺腹景鏤巖心霞疎錦薄

草密袍深露荷傾玉風螢散金檐空鵲靜山昏日沉

丘壑怡神林篁賞性千里眺監八州闕鏡玉燭調序

薰琴動味仰則高山刊規遠映

醴泉銘

魏徵

維貞觀六年孟夏之月皇帝避暑乎九成之宮此則
隋之仁壽宮也冠山抗殿絕壑為池跨水架楹分巖
竦闕高閣周建長廊四起棟宇膠葛臺榭參差仰視
則迢遞百尋下臨則崢嶸千仞珠璧交映金碧相輝
照灼雲霞蔽虧日月觀其移山迴澗窮泰極侈以人
從欲良足深尤至於炎景流金無鬱蒸之氣微風徐

動有淒清之涼信安體之佳所誠養身之勝地漢之甘泉不能尚也皇帝爰在弱冠經營四方逮乎立年撫臨億兆始以武功一海內終以文德懷遠人東越青丘南踰丹徼皆獻琛奉贄重譯來王西暨輪臺北拒元闕並地列州縣人充編戶氣淑年和邇安遠肅群生咸遂靈貺畢臻雖藉二儀之功終資一人之慮遺身利物櫛風沐雨百姓爲心憂勞成疾同堯肌之如腊甚禹足之胼胝針石屢加媵理猶滯爰居京室每弊炎暑羣下請建離宮庶可怡神養性聖上愛一

夫之力惜十家之產深閉固拒未肯俯從以爲隋氏舊宮營於曩代棄之則可惜毀之則重勞事貴因循何必改作於是斲雕爲樸損之又損去其太甚葺其頽壞雜丹墀以砂礫間粉壁以塗泥玉砌接於土階茅茨續於瓊室仰觀壯麗可作鑑於既往俯察卑儉足垂訓於後昆此所謂至人無爲大聖不作彼竭其力我享其功者也然昔之池沼咸引谷澗宮城之內本乏水源求而無之在乎一物旣非人力所致聖心懷之不忘粵以四月甲申朔旬有六日己亥上及中

宮歷覽臺觀閒步西城之陰躊躇高閣之下俯察厥
土微覺有潤因而以杖導之有泉隨而湧出乃承以
石檻引爲一渠其清若鏡味甘如醴南注丹青之右
東流度於雙闕貫穿青瑣縈帶紫房激揚清波滌蕩
瑕穢可以導養正性可以激瑩心神鑒映群形潤生
萬物同湛恩之不竭將元澤之常流匪惟乾象之精
蓋亦坤靈之寶謹按禮緯云王者刑殺當罪賞錫當
功得禮之宜則醴泉出於闕庭鵠冠子曰聖人之德
上及太清下及太寧中及萬靈則醴泉出瑞應圖曰

王者純和飲食不貢獻則醴泉出飲之令人壽東觀
漢記曰光武中元元年醴泉出於京師飲之者痼疾
皆愈然則神物之來實扶明聖既可蠲茲沉痾又將
延彼遐齡是以百辟卿士相趨動色我后固懷撝挹
推而弗有雖休勿休不徒聞於往昔以祥爲懼實取
驗於當今斯乃上帝元符天子令德豈臣之末學所
能不顯但職在記言屬茲書事不可使國之盛美有
遺典策敢陳實錄爰勒斯銘其詞曰惟皇撫運奄壹
寰宇千載應期萬物斯覩功高大舜勤深伯禹絕後

光前登三邁五握機蹈矩乃聖乃神武克禍亂文懷
遠人書契未紀開闢不臣冠冕並襲琛贄咸陳大道
無名上德不德元功潛運幾深莫測鑿井而飲耕田
而食靡謝天功安知帝力上天之載無臭無聲萬物
資始品物流形隨感變質應德效靈介焉如響赫赫
明明雜還景福葳蕤繁祉雲氏龍官龜圖鳳紀日含
五色鳥呈三趾頌不輟工筆無停史上善降祥上知
斯悅流謙潤下潺湲皎潔萍旨醴甘冰凝鏡徹用之
日新挹之無竭道隨時泰慶與泉流我后夕惕雖休

勿休居崇茅宇樂不般遊黃屋非貴天下爲憂人玩
其華我取其實還淳反本代文以質居高思墜持滿
戒溢念茲在茲永保貞吉

九成宮東臺山池賦

并序

王勃

九成宮東臺地接閒曠面山臨水爾其松峰桂壑
紅泉碧磴金石千聲雲霞萬色侍郎張公雅思沉
鬱未懷梓匠式侔仙造聿構靈塵織波成止水之
源拳石儼干霄之狀雖流波覆篔簹俯藉人機而布
葉攢花眇同天會僕因暇日濫奉清埃敢抽南畝

古今圖書集成
之才聊叙東山之事云爾

若夫金臺妙境玉署仙居酌丹池之曉暇候青禁之
宵餘驟冲情於月道飛駿賞於煙墟指山楹而思逸
懷水鏡而神虛既而仰瞻赤嶠傍窺黛壑復嶂煙迴
攢溪霧錯偉所用之兼濟想神宮之可作規壘巘於
盤龍憲飛泉於挂鶴覆篲而縈巖磴浮芥而環川壻
採拳石於溪濱舉纖珠於綺薄萍徙楚江之帶花轉
崑墟之萼岫蘊玉而虹驚浦涵珠而星落美仁智之
同歸信高深之縱託爾其扈岑漏景曲渚畱寒高松

偃鶴清篠鳴鸞被蘭丘而結珮照蓮服而披冠激坳
堂於別漱引膚寸於危巒若乃嶺橫鷄秀波連鳳渚
花鳥縈紅蘋魚漾碧綠衣元衽頰鱗翠額在林藪而
同歡望江湖而濟適及夫景沉西粵月下東濱峯深
夜久潭靜秋新荷抽水蓋薜引山茵雪芝獻液露菊
傾津嗣南商之逸興有東海之遐賓保林泉而肆賞
混簪紱而同塵何濯纓之有地如攀桂之無因

禱雨磻溪文

宋蘇軾

歲秋矣物之幾成者待雨而已穉者已秀待雨而實

三日不雨則穉者不實矣莢者已孕待雨而秀五日不雨則莢者不秀矣野有餘土室有閒民待雨而耕且種七日不雨則餘土不耕閒民不種矣穉者不實莢者不秀餘土不耕而閒民不種則守土之臣將有不任職之誅而山川鬼神將乏其祀茲用不敢寧居齋戒擇日并走羣望而精誠不款神不顧答吏民無所請命聞之曰號有周文武之師太公其可以病告乃用太禋之禮禱而不祀穀梁子曰古之神人有應上公者通乎陰陽君親帥諸大夫道之而以請焉夫

生而爲上公沒而爲神人非公其誰當之詩曰維師尚父時惟鷹揚涼彼武王肆伐大商會朝清明公之仁且勇計其神靈無所不能爲也吏民旣以雨望公公亦當任其責敢布腹心公實圖之

鳳翔太白山祈雨文

前人

維西方挺特英偉之氣結而爲此山惟山之陰威潤澤之氣又聚而爲湫潭餅罌罐勺可以雨天下而况於一方乎乃者自冬徂春雨雪不至西民之所恃以爲生者麥禾而已今旬不雨卽爲凶歲民食不繼盜

古今圖書集成
賊且起豈惟守土之臣所任以爲憂亦非神之所當安坐而熟視也聖天子在上凡所以懷柔之禮莫不備至下至於愚夫小民奔走畏事者亦豈有他哉凡皆以爲今日也神其盍亦鑑之上以無負聖天子之意下以無失愚夫小民之望

喜雨亭記

前人

亭以雨名志喜也古者有喜則以名物示不忘也周公得禾以名其書漢武得鼎以名其年叔孫勝狄以名其子其喜之大小不齊其示不忘一也余至扶風

之明年始治官舍爲亭於堂之北而鑿池其南引流種樹以爲休息之所是歲之春雨麥於岐山之陽其占爲有年旣而彌月不雨民方以爲憂越三月乙卯乃雨甲子又雨民以爲未足丁卯大雨三日乃止官吏相與慶於庭商賈相與歌於市農夫相與忭於野憂者以喜病者以愈而吾亭適成於是舉酒於亭上以屬客而告之曰五日不雨可乎曰五日不雨則無麥十日不雨可乎曰十日不雨則無禾無麥無禾歲且薦饑獄訟繁興盜賊滋熾則吾與二三子雖欲優

游以樂於此亭其可得耶今天不遺斯民始旱而賜之以雨使吾於二三子得相與優游以樂於此亭者皆雨之賜也其又可忘耶既以名亭又從而歌之曰使天而雨珠寒者不得以爲襦使天而雨玉饑者不得以爲粟一雨三日伊誰之力民曰太守太守不有歸之天子天子曰不然歸之造物造物不自以爲功歸之太空太空冥冥不可得而名吾以名吾亭

鳳鳴驛記

前人

始余丙申歲舉進士過扶風求舍於館人既入不可

居而出次於逆旅其後六年爲府從事至數日謁客於館視客之所居與其凡所費用如官府如廟觀如數世富人宅四方之至者如歸其家皆樂而忘去將去旣駕雖馬亦顧其阜而嘶余名館吏而問焉吏曰今太守宋公之所新也自辛丑八月而公始至旣至逾月而興工五十有五日而成用夫三萬六千木以根計竹以竿計瓦甃坏釘各以枚計稍以石計者計二十一萬四千七百二十有八而民未始有知者予聞而心善之縣令胡允文具石請書其事余以爲有

足書者乃書曰古之君子不擇居而安安則樂樂則喜從事使人皆喜從事則天下何足治歟後之君子常有所不屑苟有所不屑則躁否則惰躁則妄惰則廢既妄且廢則天下之所以不治者常出於此而不足怪今夫宋公計其所歷而累於勤使無齟齬於世則今且何爲矣而猶此官哉然而未嘗有不屑之心其治扶風也視其施艱者而安植之求其蒙茸者而疏理之非特傳舍而已事更有小於傳舍者公未嘗不盡心也常食芻豢者難食菜常衣錦者難於衣布

常爲其大者不屑爲其小此人之通患也詩曰豈弟君子民之父母所貴乎豈弟者豈非以擇居而安安而樂樂而喜從事歟夫修傳舍誠無足書者以傳舍之修而見公之不擇居而安安而樂樂而喜從事者則是真足書也

凌虛臺記

前人

國於南山之下宜若起居飲食與山接也四方之山莫高於終南而都邑之麗山者莫近於扶風以至近求最高其勢必得而太守之居未嘗知有山焉雖非

事之所以損益而物理有不當然者此凌虛之所爲
築也方其未築也太守陳公杖履逍遙其下見山之
出於林木之上者纍纍如人之旅行於牆外而見其
髻也曰是必有異使工鑿其前爲方池以其土築臺
高出於屋之簷而止然後人之至於其上者恍惚不
知其臺之高而以爲山之踴躍奮迅而出也公曰是
宜名凌虛以告其從事蘇軾而求文以爲記軾復於
公曰物之廢興成毀不可得而知也昔者荒草野田
霜露之所蒙翳狐虺之所竄伏豈知有凌虛臺耶廢

興成毀相尋於無窮則臺之復爲荒草野田皆不可
知也嘗試與公登臺而望而其東則秦穆之祈年橐
泉也其南則漢武之長楊五柞而其北則隋之仁壽
唐之九成也計其一時之盛宏傑詭麗堅固而不可
動者豈特百倍於臺而已哉然而數世之後欲求其
彷彿而破瓦頽垣無復存者旣已化爲禾黍荆棘丘
墟隴畝矣而况於此臺歟夫臺猶不足恃以長久而
况於人事之得喪忽往而忽來者歟而或者欲以夸
世而自足則過矣蓋世有足恃者而不在乎臺之存

古今圖書集成
亡也既自言於公退而爲之記

周公潤德泉碑

元孔克仁

岐山縣西北行十里而遙沒源而入崖斷若窮聿瞻
彼咀壘浪翠湧豁然開朗行爲陂陲古樹互雲周廟
有恤赤鳥袞衣吐握可想降祀稍東而北行六七十
步直抵其麓有井作亭其上覆以翠瓦傍出八觚井
方四跬厥深倍之歲久以智民用弗淑稽諸故實世
亂則竭在唐大中初一日風作羣泉湧出守臣珙上
其事壘書褒嘉錫名潤德嘉祐時蘇軾吏茲土能詠

其事自是或否古老屢占以爲戚喜大元世祖卽位
十七年天下大定斯泉復通恆出不竭承平未百年
至正之阨防決波潰黎乃戾經紅抹其額群衡四突
所在俱起陽弱於淵釜焦不沃至此極矣平章李公
思齊師駐是土奮威揚武期耆廓清乃廿又四年甲
辰春三月有事於廟仁實陪以行已事而竣俯覽興
惻秋九月井泉忽見竇溜瀆灑迸若飛玉爲汎爲濫
交走亭下奔流淙淙鏘若環珮前有竹園流經其間
徑注民田始會於一激爲機輪漑爲膏壤民賴其饒

野夫來看婦子相語茲泉之出厥兆何繇雖可欣也
亦可異也李公繼封關國深惟國家厚恩憤不得急
清君側以報天子下泉之思千載共愜亦欣且異語
予以故予爲言曰泉在地中譬若血脈氣和則滋液
華潤逆則壅底爲病周伯陽甫曰水演而民用陽伏
而不能出陰迫而不能升則原塞原塞川必竭三代
之季河洛是矣聖王體信以達順太和薰蒸淳鬱溥
濩下降上騰滑而若飴滃而爲醴嘉生茂豫物不疵
癘此順之寶也矧天作高山肇開姬祀公且以聖制
渠澤流罔極聲靈赫濯儼在故宮洋洋陟降溥博時
出必有開也民咸曰休哉是宜刻石以識其徵銘曰
紐謐軸旋匪色音兮蒸而降澤騰淫淫兮鬱而壅底
爲沴祲兮體信達順懜莫謀兮彼岐肇姬氣滃淳兮
公旦有鬼芒以芴兮祠東有井或潤竭兮問諸遺老
詢故實兮斯泉見否理亂乘兮屯膏發華以類徵兮
微通元兆厥有憑兮菅闇誰極予汝銘兮

重修太王廟記

明郭仲南

余奉上命使陝右道經岐山同余登正統己未進士

古今圖書集成
第汝州王君澤適宰是邑臥疾不視事署邑事幕賓
四川高文謁余告曰長官王君謂岐山周之舊邦必
有古先哲王陵廟基址注意詢采距縣北四十里曰
岐陽鎮得太王廟俗人訛傳赧王廟齋牲酒往奠之
見廟宇傾頽雨淋日炙塑像剝落過半悵望久之忽
於敗垣得石碣焉命左右揩拭辨觀乃周太王廟號
倍加感嘆慨然有意於更新時正統乙丑孟春月實
君下車之二年也王於是歸名岐之父老侯聚等百
餘人論曰吾謁周太王廟蓋太王昔居邠地爲狄人

侵之不欲以所養人者害人遂棄邠之土地遷邑於
岐而邠人沐其深恩厚澤謂仁人不可失亦從來居
於此其德加斯民澤被當世積功累仁遂啓有周八
百餘年之天下延三十餘世之丕祚上自三皇下及
唐宋其傳世永久未有盛於有周也今厥廟廢壞若
是寄民社者所不忍觀不可無重修之舉衆咸唯唯
遂於是歲之秋起工助財者有焉輸力者有焉衆工
咸集不數月廢者舉缺者補壞者興朽腐者堅之剝
落者飾之而廟貌尊嚴殿宇輪奐巍然爲一邑之壯

觀也居人過客薦時物者莫不聳其瞻仰恍然如復
覩太王自邠遷岐民從如歸之盛於今日是年一冬
無雪惟廟克修大雪彌日王君喜無以極居民亦從
而喜甚歡騰一邑咸以王君之心有以感夫太王之
神太王之神有以應夫王君之誠故兆此豐年之瑞
前廟之建不知始自何代緣無碑記無從考據今獲
再修不可無文以記其事願有請焉余惟太王實肇
基王迹之賢君也岐山實太王自邠始遷之都邑也
廟建於斯宜矣血食於斯宜矣其香火之傳於斯則

累千百世亦宜矣嗚呼物換星移城郭變遷幾世幾
更不可勝記可勝嘆夫雖然今岐山卽古之岐山也
世道有隆替城郭有變遷而岐山則不與之俱隆替
俱變遷矣太王之名則與岐山之名相爲悠久而不
泯矣豈有隆替與變遷也耶王君於公事之餘乃能
敦崇先王祀事孔明如此其用心亦勤矣其爲志可
尙矣後之來尹是邑者其能心王君之心則斯廟殆
將與岐山同垂名於天地間矣且太王之德業見在
簡冊不復詳著茲特記其重修歲月以復高文之請

古今圖書集成
大書深刻壽諸堅珉以昭後世而傳無窮焉

君子亭記

張應福

鳳翔郡城外巽方有湖宋蘇子八觀詩載之迄今數百年興廢湮築不知其幾矣頃予來巡察關西因慕蘇子文學政事得考究其往蹟滄海桑田惟是湖尚在規模湫隘無復爾時風物之勝湖南閒田十數畝中有基丈餘殆前人所欲爲而未竟者予因建亭其上北面是湖湖有蓮盈二三畝餘三方植竹萬竿翠蓋紅芳搖金曼玉岸渚交映良足怡懷亭旣成客有

攜酒而落之者遂請其名予曰君子哉客曰何爲其君子也予曰夫蓮花之君子周濂溪嘗言之劉巖夫植竹記亦以剛柔忠義數德比君子斯亭上下四旁罔非君子獨不可以君子名乎雖然蓮之爲君子也夏秋之交亭亭之節不染之操盛矣美矣及夫秋老霜嚴草枯葉脫盛美者不可復見惟是竹也方赫曦而著蔭遇怒風而不折歷霜雪而常青小之可以備笙簧唱和於廟堂之間大之可以爲簡策永存於圖書之府蓮固不得以擬之於戲蓮花乘時效用之君

古今圖書集成
子也竹則始終全節之君子也君子之處世因時以有爲久暫而一致斯無愧於二物焉耳孔子嘗謂聖人吾不得而見之矣得見君子者斯可矣予亦謂人之君子吾不得而見之矣得見物之君子者斯可矣夫物之爲君子尚爲人之所願見况人之爲君子乎客然而退遂以名吾亭而鐫之石用垂不朽云

古槐記

前人

國朝設關西道分治鳳翔府開署定居則自孟德間始也公署內古槐十二株布列有方氣象森然其高

則干霄摩空其大則覆車蔭畝虬龍夭矯柯幹屈也虎豹眠伏根株突也波濤乍湧風雨聲也笙簧疊奏鶻鷓鳴也翠幄雲張夏之日也烏鴉陣驚冬之夜也黃花照眼常思計吏之忙綠蔭盈庭大衍後人之澤雖莎庭之鼓吹無爲之石友不是過之予獨慨其無以知始植之歲月年所之多歷可傳於後耳嘗考是地西則景福金佛之宮寺創自宋元長松老柏數百年物皆處斯槐下北數十步凌虛臺之故址存焉斯槐適當其前其將爾時之遺耶夫材木產於山林非

古今圖書集成
不壽且滋也一經工師之擇棟明堂支大廈榮矣美矣而木之生意則息斯槐處城市之中小不厄於牛羊大不戕於斧斤非造物者之獨厚士君子之封植何以能久以此較彼孰得孰失必有能辨之者孟子云故國非謂有喬木之謂有世臣之謂予則曰世臣喬木交相倚重有世臣之功而後喬木保發榮滋長之性有喬木之植而後世臣昭奠安宗社之勳是故表土宇之寧謐聳士民之觀瞻於斯槐有賴焉或者謂此槐夜出火光如紅衣人爲異盍去諸予曰非然

也淮南子云古槐生火久血爲燐人不怪後之士大夫黜疑似之見推愛物之仁俾勿剪而勿敗則太清之檜孔明之柏豈專美於前乎是爲記之

愛蘇亭記

陳棊

扶風城南數武有山曰飛鳳山之上有序舊題曰遠愛相傳蘇長公軾之所書今不存余曰山去城里許非遠也山之亭仰面即可見舉足即可登可愛甚近也而名曰遠愛者長公之寄興於遠耳余更題爲愛蘇亭昔蘇子之所愛者山亭也今人之所以愛此山

古今圖書集成
此亭者以曾經蘇公之所愛也山亭經蘇公之所愛而山之可愛者益增是今人之所以愛此山亭者實愛蘇公也更名愛蘇義奚不宜雖然陳子能愛蘇公之所愛其繼而來者又焉知無愛陳子之所愛者乎愛陳子之愛卽愛蘇子之愛而愛蘇之說益明矣因爲愛蘇亭說明嘉靖壬子給事中陳棐記

石門記

楊博

走三千里到汧閱歷山川奇勝目炫心招乃始望洋而驚適適然歎天地之大也顧山不孤放水不遂往

凡名山大川每相附麗匡廬也附乎彭蠡姑胥也附乎震澤鍾山牛首也附乎大江羅浮武夷也附乎渤海故凡言山必兼言水以其爲物不二也秦饒於山嗇於水卽水亦多漫衍迅削與山不相親比夫人一身膚骨營血相附不離而後氣韻生動丰采離披發之清和潤澤望而知爲靈秀焉山其骨也土石相間夷衍綿沓其膚也水則其營衛血澤也秦地百二雄甲天下如崆峒太白龍門少華諸山膾炙人口余恨未盡寓目其他峻峭蟠曲高並蒼天深極幽谷固多

奇勝哉然骨或稜露膚或皴笨呆重童枯對之悶頓
每懷南中江山之秀思得放舟湖上弄水江邊觀競
渡於天中望濤氣於八月言念徒殷祇勞夢寐耳公
餘偶暇尋訪禹蹟因縱視城頭石門其山石對立膚
色皆青瑩潤澤不枯且層疊起臥蜿蜒垂下俯臨深
潭有金山半壁之勢汗輝二水匯奔極猛到峽口鎖
束若扼吭逆留之水不得快志遂往乃怒激奔騰兩
相射激若兵挺擊撞回復鬪鬪經數遭乃去去則鳥
奔獸軼衝石翻岸若武夫悍卒醉怒決張不可拘縛

益以淫雨暴漲川水迸發則洶湧怒號驚聞數里聲
光所激則全平江濤飛立之勢矣對岸羣山聳翠攢
疊迴翔山腰一抹空闊旋繞各饒秀致日暮鴉歸遠
樹鷺落沙汀烟霧迷離夕陽返照頗有南中景况此
則山水相遭有聲有韻有景有色所謂骨與膚衛相
附而呈采也夫山水豈必高深取其足以寄適性情
暢發天懷而已予坐斗大城中日苦奔走必求華嶽
太行瞿塘孟門逞極大觀而後快志無論時不我假
會不適逢且拋却目前侈想遠大不令一拳一勺笑

我誕妄哉蘇子云山水無常主閒者便是主人予與石門若米顛袖中石嵌空玲瓏時相玩弄仍恐傳舍吏一朝攫去此塊然者將不復爲我有今既有之又偷得餘閒云胡不愛且賞也因咏懷數首聊以寄興且厚有所托於石門以待後之蒞茲土者

終南太白說

前人

終南山橫亙關中南面起秦隴徹藍田凡雍岐郿鄠長安萬年遠且八百里而延袤峙踞其南者皆此一山也故韓愈南山詩曰西南雄太白突起莫間筵藩

都配德運分宅占丁戊逍遙越坤位詆訐陷乾竇如關中記謂終南山之總名太乙山之別號此其例也水經注武功終南引杜預爲據而曰此山亦名終南亦名太白其曰終南固無間乎武功與萬年至云太白則舊隸武功爲冬夏積雪望之皓然故名雍錄謂古圖志無言太白卽太乙者惟長安志萬年巖谷有太乙祠始可命爲太乙而非武功之太白則古文以武功終南爲太乙者殆誤認武功太白而莫或正之耳其山高大多出物產夏書曰終南惇物秦詩曰終

南何有有條有梅醇厚也厚物者即東方朔所謂玉石金銀銅鐵豫章檀栢百王可以取給萬民可仰足者也是自堯禹周漢皆謂終南饒物產不當別有一山自名厚物班志引古文而以太乙爲終南垂山爲厚物也誤矣蓋以太乙太白爲終南則可而分太乙太白終南爲三則不可故李吉甫在元和間核關中終南所歷而著諸郡縣自郿鄠武功至長安萬年皆著終南且曰在某縣某方幾里則太白專屬縣境太乙專屬萬年而南山在關中者統名曰終南云

褒斜同谷說

前人

古今志褒斜者皆謂南北同谷惟何氏雍大記不然謂自秦入蜀有三谷四道西南曰褒谷南曰駱谷從洋入東南曰斜谷從郿入其棧道有四出從成和階文出者爲沓中陰平道鄧艾伐蜀由之從兩當出者爲故道漢高帝攻陳倉由之從褒鳳出者爲今連雲棧道漢王之南鄭由之從成固洋縣出者爲斜駱道武侯屯渭上由之此四道三谷余未履其地但就其所分疏求之夫旣以駱谷爲南則斜谷當在西南且

斜駱二谷地望各異何得概稱一道爲武侯屯渭所經由耶蓋褒谷在蜀漢西北不得爲自秦入蜀之路若從秦川言則南曰駱谷在盩厔西南爲郿則斜谷耳乃訛西南曰東南將以郿在盩厔之東乎哉故程大昌述高帝之入關也正月羽封沛公爲漢王都南鄭封秦將章邯爲雍王都廢丘四月漢王入蝕中至南鄭蝕中不見地書以地望言關中南面礙山不可直達其有微徑可達漢中者唯子午關在長安南次西有駱谷關又西則褒斜也此蝕中非駱谷則子午

耳若大散則在西南不與咸陽對出非其地矣其年五月漢王引兵襲雍則自褒斜出蓋雍之陳倉也漢王旣出章邯走廢丘遂定雍縣東圍廢丘邯自殺復遣樊噲周勃引兵下郿安得謂駱谷在南而斜谷又在東耶又按鄭氏地理略當蜀魏時陳倉東北十五里爲郿城亮攻陳倉不拔又攻郿不能克乃引還國志雖無其文而漁仲博雅必有所據則高帝後亮亦攻陳倉及郿而不獨屯渭上由斜駱道矣蓋駱谷出扶風隔南山中有三嶺一曰沈嶺近芒水在盩厔一

曰衙嶺一曰分水嶺固郿斜谷水所從出以入渭者也乃知斜駱二谷在南山中其脉勢實相聯接緣本著末則郿與蓋屋皆有駱谷而雍大記乃統稱斜駱道云所以記事者又有元僖西幸由斜谷之說見次柳氏舊聞及張彭者舊傳

鳳翔府部藝文二 詩

大雅縣九章

詩經

此亦周公戒成王之詩追述太王始遷岐周以開王業而文王因之以受天命也

縣縣瓜瓞民之初生自土沮漆古公亶父陶復陶穴未有家室 比也

古公亶父來朝走馬率西水滸至于岐下爰及姜女

聿來胥宇 賦也

周原膺膺董荼如飴爰始爰謀爰契我龜曰止曰時

築室于茲 賦也

迺慰迺止迺左迺右迺疆迺理迺宣迺畝自西徂東

周爰執事 賦也

乃召司空乃召司徒俾立室家其繩則直縮版以載

作廟翼翼 賦也

揀之陬陬度之薨薨築之登登削屢馮馮百堵皆興

馨鼓弗勝 賦也

迺立臯門臯門有伉迺立應門應門將將迺立冢土

戎醜攸行 賦也

肆不殄厥愠亦不隕厥問柞械拔矣行道兌矣混夷

駮矣維其喙矣 賦也

虞芮質厥成文王蹶厥生予曰有疏附予曰有先後

予曰有奔奏予曰有禦侮 賦也

武溪深行

漢馬援

滔滔武溪一何深鳥飛不度獸不能臨嗟哉武溪兮

多毒淫

扶風歌

九首錄七首

晉劉琨

朝發廣莫門暮宿丹水山左手彎繁弱右手揮龍淵

二

顧瞻望宮闕俯仰御飛軒據鞍長歎息淚下如流泉

三

繫馬長松下發鞍高岳頭冽冽悲風起泠泠澗水流

四

揮手長相謝嗚咽不能言浮雲爲我結飛鳥爲我旋

五

去家日已遠安知存與亡慷慨窮林中抱膝獨摧藏

六

麋鹿遊我前猿猴戲我側資糧既乏絕薇蕨安可食

七

攬轡命徒侶吟嘯絕岳中君子道微矣夫子故有窮

扶風歌

宋鮑昭

昨辭金華殿今次鴈門縣寢臥握秦戈棲息一作抱

越箭忍悲別親知行泣隨征傳寒烟空徘徊朝行乍

舒展

朝天嶺

唐盧照鄰

十年遊蜀道萬里回長安徒費周王粟空彈漢史冠

古今圖書集成
馬蹄穿欲盡貂裘破轉寒層冰橫九折積石凌七盤
重溪既下瀨峻峯亦上竿隴頭聞戍鼓嶺外溷飛湍
瑟瑟松風急蒼蒼山月團傳語後來者行路誠獨難

初秋九成宮應制

劉禕之

帝圃疏金闕仙臺駐玉鑾野分鳴鶯岫路接寶鷄壇
林樹千霜積神宮四序寒蟬急知秋早鷲疎覺夏闌
怡神紫氣外凝盼白雲端舜海詞波發空驚遊聖難
奉教追赴九成宮途中口號

李嶠

委質承仙翰祇命遄搖策事偶從梁遊人皆背淮客
長驅歷川阜迴眺窮原澤鬱鬱桑柘繁油油禾黍積
雨餘林氣靜日下山光夕未扳藁桂巖猶倦飄蓬陌
行當奉麾蓋慰此勞行役

古風

李白

太白何蒼蒼星辰上森列去天三百里邈爾與世絕
中有綠髮翁披雲臥松雪不笑亦不語冥棲在巖穴
我來逢真人長跪問寶訣粲然啓玉齒授以鍊藥說
銘骨傳其語竦身已電滅仰望不可及愴然五情熱
吾將營丹砂永與世人別

登太白峰

前人

西上太白峯夕陽窮登攀太白與我語爲我開天關
願乘冷風去直出浮雲間舉手可近月前行若無山
一別武功去何時復見還

九成宮

杜甫

蒼山入百里崖斷如杵白層宮憑風迴岌業土囊口
立神扶棟梁鑿翠開戶牖其陽產靈芝其陰宿北斗
紛披長松倒揭嶙怪石走哀猿啼一聲客淚迸林藪
荒哉隋家帝製此今頽朽向使國不亡焉爲巨唐有

雖無新增修尚置官居守巡非遙水遠跡是雕牆後
我行屬時危仰望嗟歎久天王狩太白駐馬更搔首

勅借九成宮避暑

王維

帝子遠辭丹鳳闕天書遙借翠微宮隔牕雲霧生衣
上捲幔山泉入鏡中林下水聲喧語笑巖前樹色隱
房櫳僊家未必能勝此何處吹簫向碧空

赴北庭度隴思家

岑參

西向輪臺萬里餘也知鄉信日應疎隴山鸚鵡能言
語爲報家人數寄書

岐山下

二首
錄一

韓愈

丹穴五色羽其名爲鳳凰昔周有聖德此鳥鳴高岡
和聲隨祥風窅窕相飄揚聞者亦何事但知時俗康
自從公旦死千載闕其光吾君亦勤理遲爾一來翔

代扶風主人答

王昌齡

殺氣凝不流風悲月彩寒浮埃起四遠遊子迷不歡
依然宿扶風沽酒聊自寬寸心亦無理長鋏誰與彈
主人就我飲顧我還慨然便泣數行淚因歌行路難
十五役邊城三回討樓蘭連年不解甲積日無所餐

將軍降吳城國使沒桑乾去時三十萬獨自還長安
不信沙場苦君看刀箭瘢鄉親零落盡塚墓亦摧殘
仰攀青松枝慟絕摧心肝禽獸悲不去路旁誰忍看
幸逢休明代寰宇靜波瀾老馬思伏櫪長鳴力已殫
少年與運會何事發悲端天子初封禪賢良刷羽翰
三邊悉如此否泰亦須觀

三良塚

柳宗元

束帶佐明后顧盼流輝光一心在陳力鼎列夸四方
款款效忠信恩義皎如霜生時亮同體死歿寧分張

古今圖書集成
壯軀閉幽邃猛志填黃場殉死禮所非况乃用其良
霸基弊不振晉楚更張皇疾病命固亂魏氏言有章
從邪陷厥父吾欲討彼狂

九成宮

李商隱

十二層城閭苑西平時避暑拂虹霓雲隨夏后雙龍
尾風逐周王八駿蹄吳嶽曉光連翠巘甘泉晚景上
丹梯荔枝盧橘霑恩澤鸞鵠天書濕紫泥

汧陽縣閣

韋莊

汧水悠悠去似緝遠山如畫翠眉橫僧尋野渡歸吳

嶽鴈帶殘陽入渭城邊靜不收蕃帳馬地貧惟賣隴
西鸚牧童何處吹羌笛一曲梅花出塞聲

懷賢閣

宋蘇軾

南望斜谷口三山如犬牙西臨五丈原鬱曲若長蛇
緬懷諸葛公萬騎出漢巴吏士寂如水蕭蕭聞馬搗
公才與曹丕豈止十倍加顧瞻三輔間勢若風捲沙
奈何長星墜竟使蜀婦髻山僧豈知此一室老烟霞
往事逐雲散故山依渭斜客來空弔古清淚落悲笳

東湖

前人

古今圖書集成
吾家蜀江上江水綠如藍邇來走塵土意思殊不堪
况當岐山下風物猶可慙有山秃如赭有水濁如泔
不謂郡城東數步見湖潭入門便清澳恍如夢西南
泉源從高來隨波走涵涵東去觸重阜盡爲湖所貪
但見蒼石螭開口吐清甘借汝腹中過胡爲目眈眈
新荷弄晚涼輕櫂極幽探飄飄忘遠近偃息遺佩簪
深有龜與魚淺有螺與蚶曝晴復戲雨戢戢多於蠶
浮沉無停餌倏忽遽滿籃絲緝雖強致瑣細安足戡
聞昔周道興翠鳳棲孤嵐飛鳥飲此水照影弄毳毼

至今多梧桐合抱如彭聃絲羽無復見止有鷓搏鷓
嗟予生雖晚考古志所耽圖書已漫漶猶復訪僑郟
卷阿詩可繼此意久已含扶風古三輔政事豈汝諳
聊爲湖上飲一從醉後談門前遠行客劫劫無畱驂
問胡不回首無乃趨朝參予今正疎慢官長幸見涵
不辭日遊再行恐歲滿三暮歸還倒載鐘鼓已齟齬
遷內翰給假回眉過鳳翔遊大像寺

前人

金沙泉湧雪濤香洒作醍醐大地涼倒浸九天河影

古今圖書集成
白遙通百谷海聲長僧來汲月歸靈石人到尋源宿
上方欲續茶經校奇品山瓢留待羽仙嘗

斯飛閣

前人

西南歸路遠蕭條倚檻魂飛不可招野闊牛羊同鴈
驚天寬草樹接雲霄昏昏水氣浮山麓汎汎春光弄
麥苗誰使愛君輕故國此方無計老漁樵

自寶鷄陽平至斜峪宿蟠龍寺

前人

橫槎晚渡碧澗口騎馬夜入南山峪峪中暗水響瀧
瀧嶺上疎星明煜煜寺藏巖底千萬仞路轉山腰三

百曲風生餓虎嘯空林月黑驚麝竄修竹入門突屋
見深殿照佛青熒有殘燭媿無酒食待遊人旋斫松
杉煮溪藪板間獨眼驚旅魂木魚曉動隨僧粥起觀
萬瓦鬱參差日亂千巖散紅綠門首商賈負椒莽山
後咫尺連巴蜀何時歸耕江上田一夜心逐南飛鵠

遺愛亭

元魯懋

溪南一帶列千家高下樓臺傍水斜天闊亂鴻橫晚
照烟輕百鳥弄晴沙波光映澈涵山影秋色澄清鑑
物華僧倚上方雲繞檻市聲昏曉自諠譁

古今圖書集成
五丈原

明何景明

風日高原暮松杉古廟陰三分扶漢業萬里出師心
星落營空在雲橫陣已沉千秋一瞻眺梁甫爲誰吟

君子亭嘉蓮

朱圻

雲影徘徊一鑑空孤嵐山色映簾櫳波隨浴鷺搖仙
舫歌雜絲絃吼樹風紅杏花飛雙岸錦蒼松翠拂晚
烟籠金卮對酒情無限渾擬乘槎過斗宮

鳳凰泉

王麒

鳳凰山下草迷嵐泉響飛秋落曉曇石徑漱琴月色

暗溪花泛雨野香含浮空星斗晴方爛臥底蛟龍睡
正酣欲直還斜流自遠溶溶脉湧自拖藍

天臺山

劉嶠

策杖天臺訪勝來故宮高處任徘徊山容歲歲常如
此樓殿層層安在哉禾黍不堪追往事蒼松猶自點
青苔獨憐當日填坑衆化作啼鵲夜夜哀

鳳臺山

吳琮

靈鳥當年傍碧流危岑千載一孤洲於今只有宮前
水依舊潺湲未肯休

寶鷄縣

汪廣洋

渭河霜滿水如苔一縣人家半草萊惟有秋風酸棗
木淡烟深鎖鬪鷄臺

天章山

陸詒

青嶽崢嶸白日麗巖泉外朴澗澗外野泉
流對巖松以次分若木森不似區中區外餘自
來林天高鳥鳴林來如對其前嶺山寒氣氣常收

欽定古今圖書集成方輿彙編職方典

第五百二十八卷目錄

鳳翔府部紀事

鳳翔府部雜錄

鳳翔府部外編

職方典第五百二十八卷

鳳翔府部紀事

舊志周文王時鳳凰鳴于岐山

麟遊縣志文王時鳳棲西郊石岑

舊志幽王三年西川三山皆震岐山崩

考王六年六月扶風雨雪

列仙傳老子者姓李氏名耳字伯陽諡曰聃周守藏室之吏也其學以自隱無名為務見周之衰乃乘青牛西去關令尹喜望東方紫氣當有真人過關老子

古今圖書集成
至曰子將隱矣強爲我著書于是老子乃著書上下
篇言道德之意五千言而去莫知所終

舊志秦繆公十四年岐山扶風大饑

始皇五年岐山扶風大蝗疫

帝王世紀秦寧公葬西山大麓故號秦陵山也

封禪書秦文公獲若石云于陳倉北阪城祠之其神
或歲不至或歲數來來也嘗以夜光輝若流星從東
南來集於祠城則若雄鷄其聲殷殷野鷄夜雉以一
宇祠命曰陳寶

人物考百里奚爲秦相其妻至秦知之而未敢言一
日奚坐堂上樂作所賃澣婦自言知音因援琴撫絃
而歌曰百里奚五羊皮憶別時烹伏雌炊扈扈今日
富貴忘我爲歌畢奚愕然問之乃其故妻也遂還爲
夫婦

韓非子秦康公築臺二年荆人起兵將以攻齊任妄
曰饑召兵疾召兵勞召兵亂召兵君築臺二年今荆
人起兵臣恐其以攻齊爲聲而以襲秦爲實也不如
備之戍東邊而荆人輟行

府志漢文帝初元年夏關東蝗

武帝元狩元年十月隴州五色雲見

扶風縣志元狩元年至雍郊見五時獲一角獸作白

麟之歌

通志三年麟遊縣獲白麟於鳳鳴山前

元封中扶風無雲如雷者三或如虹氣蒼黃若飛鳥

集棧陽宮南聲聞四百里隕石二黑如鱉有司以為

祥

西京雜記戚夫人侍兒賈佩蘭後出為扶風人投儒

妻嘗言宮中事見戚夫人侍高帝數以趙王如意為

言而高帝思之幾半日不言歎息悽愴而未知其術

使夫人擊筑高帝歌大風詩以和之又云宮內嘗以

絃管歌舞相歡娛競為妖服以趨良時十月十五日

共入靈女廟以豚黍樂神吹笛擊筑歌上靈之曲既

而相與連臂踏地為節歌赤鳳凰來至七月七日臨

百子池作于闐樂樂畢以五色縷相羈謂之相連愛

八月四日出雕房北戶竹下圍棋勝者終年有福負

者疾病取絲縷就北辰星求長命乃免九月九日佩

古今圖書集成
茱萸食蓬餌飲菊花酒令人長壽菊花舒時并采莖
葉雜黍米釀之至來年九月九日始熟就飲焉謂之
菊花酒正月上辰出池邊盥濯食蓬餌以祓邪三月
上巳張樂于流水如此終歲焉戚夫人死侍兒皆復
爲民妻

甘泉苑武帝置緣山谷行至雲陽三百八十一里西
入扶風凡周迴五百四十里苑中起宮殿樓閣百餘
所有仙人觀石闕觀鵠鵲觀

府志元帝初元三年茂陵白鶴館災詔赦天下

成帝罷五時祠至南郊日大風折拔時中樹木十圍
以上百餘天子異之復五時祠

僞莽地皇三年夏扶風飛蝗蔽天

王莽末年茂陵董喜等數千人假號稱漢將與衆發
兵掘莽妻子父祖塚燒其棺槨及九廟明堂辟雍

光武建武二年詔拜趙匡爲右扶風將兵助馮異并
送縑穀異兵穀甚盛乃稍誅擊豪傑不從令者

六年五月隗囂反使其將王元據隴坻十二月詔祭
遵軍汧破囂將王元兵

八年春來歙將兵二千人伐山開道從番須回中徑襲略陽冬吳漢引兵下隴遵屯汧不退

九年祭遵卒于師馮異領其營夏來歙馬援護諸將馮異等屯長安詔于汧積穀六萬斛十月帝如長安遂至汧

茂陵丁君都善相馬馬援受其法以所得交趾駱越銅鼓鑄爲法馬高三尺五寸圍四尺四寸備列骨相詔置宣德殿下爲名馬式

和帝元興元年地震五月癸酉右扶風地裂

安帝元初二年九月以虞詡爲武都太守羌衆數千遮詡于陳倉穀谷詡增竈破之

延光二年岐州地大震岐山有聲

三年六月辛未扶風白鹿見

順帝末建三年七月丁酉茂陵寢園災帝縞素避正殿

末和五年羌寇武都燒隴關

桓帝延熹四年右扶風地震

七年六月十三日扶風星隕爲石聲聞三郡

古今圖書集成
張讓在桓帝時權傾中外讓有監奴主家扶風富人
孟陀傾囊結奴奴德之問陀何欲欲爲成就陀曰望
汝曹爲我一拜耳時公卿求謁讓者車每填門陀一
日詣讓壅不得前監奴望見爲率諸蒼頭迎拜于路
共舉入時賓客大驚謂讓厚陀遂爭賂陀旬日積資
巨萬

靈帝熹平四年六月中平二年七月三輔俱螟蟲爲
害

中平二年董卓討羌還屯扶風

獻帝初平二年夏四月王允誅董卓以宋翼爲馮翊
王宏爲扶風卓部將李傕郭汜犯闕欲殺允乃先徵
翼宏宏遣使謂翼曰汜傕以我二人在外故未危王
公今日就徵明日俱族計將安出翼曰雖禍福難量
然王命所不得避也遂俱就徵傕收允宏翼殺之
茂陵富人袁廣漢藏鏹巨萬家僮八九百人于北邙
山下築園東西四里南北五里激流水注其內構石
爲山高十餘丈連延數百養白鸚鵡紫鴛鴦犛牛青
兕奇獸怪禽委積其間積沙爲洲嶼激水爲波潮其

古今圖書集成
中致江鷗海鶴孕雛產鷩延漫林池奇樹異草靡不
具植屋皆徘徊連屬重閣修廊行之移晷不能遍也
廣漢後有罪誅沒入爲官園鳥獸草木皆移置上林
苑中

茂陵文固陽本瑯琊人善馴野雉爲媒用以射雉每
以三春之月爲茅幃以自翳用雉矢以射之日連數
百茂陵輕薄者化之皆以雜寶鑿廁翳幃以青州蘆
葦爲弩矢輕騎妖服追隨于道以爲歡娛陽死其子
亦善其事董司馬好之以爲上客

後主建炎六年右將軍亮伐魏圍陳倉守將郝昭兵
千人晝夜相攻拒二十餘日魏遣張郃救之未至亮
引還將軍王雙追亮亮擊斬之

十二年諸葛亮至郤軍于渭水之南屯兵五丈原耕
者雜于渭濱居民之間百姓安堵軍無私焉八月亮
卒于師

晉惠帝元康七年七月雍秦旱疫隕霜殺秋稼米斛
萬錢

懷帝永嘉五年安夷護軍麴允與馮翊太守索綝敗

漢兵于長安註安夷關名在隴州西北七十里唐志
汧源縣有安夷關

穆帝永嘉十一年二月秦大蝗自華陰至隴山百草
無遺牛馬相噉毛

孝武帝太元十年五月西燕攻長安秦王堅出奔五
將山六月後秦圍五將山執秦王堅以歸註五將山
在岐山縣北三十里

十六年五月秦王登及後秦王萇戰秦師敗績屯郿
及姚泓為宋武帝所滅後鳳翔屬赫連勃勃

宋文帝元嘉六年十月扶風地震草木皆自反

北魏孝明帝正光二年八月岐雍地震

五年魏都督元志討莫折念生戰于隴口敗績東保
岐州十一月莫折念生遣其弟天生陷岐州殺都督

元志

孝昌元年春星隕于岐如雨魏行臺蕭寶寅都督崔
延伯討莫折天生敗之岐雍隴東皆平夏五月雨雹
傷禾苗

三年蕭寶寅討莫折念生敗績汧城岐州皆降於賊

古今圖書集成
北齊書魏蘭根傳蘭根孝昌初轉岐州刺史從行臺
蕭寶寅討破宛州俘其民人爲奴婢以美女十人嘗
蘭根蘭根辭曰此縣界于強虜皇威未接無所適從
故成背叛今當寒者衣之饑者食之奈何將充僕隸
乎盡以歸其父兄部內麥多五穗鄰州田鼠爲災犬
牙不入岐境

府志隋文帝開皇五年麟遊獲白麟於北郊因改爲
麟遊郡

仁壽二年岐雍地震

煬帝大業末有道者居太白山煉丹砂得道居山數
十年有成彌者給侍最久不告以道一日以家艱辭
去道者遺之丹十粒令一粒化赤銅十斤足辦葬事
彌還如言襄事復入山求丹不與乃持刃刦之斷手
則足顏色不變彌滋怒并斬其首解衣見肘後有赤
囊開之則丹也彌喜持之下山忽聞呼彌聲回顧乃
道者也曰吾不期至於此子無德受丹神必誅汝終
如吾矣言已不見彌大驚然旣得丹則多變黃金金
色稍赤異於常金家大富爲人告云有姦彌自列能

古今圖書集成
成黃金唐太宗名試有驗因授五品官令造金要盡天下之銅乃已凡造數萬斤而丹盡因求去帝令列其方弼訴不知帝謂其詐斷手削足以至斬首如道者云

隋末年群盜并起李洪據扶風郃江海據岐山丘行恭聚兵萬人保郿城

唐太宗貞觀六年四月十六日醴泉出九成宮西城之陰

高宗永徽六年閏四月大雨帝在萬年宮夜山水衝

元武門帝遽出登高水入寢殿漂溺宮人三千餘是年扶風岐山俱大水渭河決流衝地數百畝

儀鳳三年夏帝幸萬年宮五月山中大寒從兵多凍死

明皇天寶八載夏麟遊麥生二岐秋禾一莖三穗

十四載十二月月蝕歲星在東井未幾明皇自岐幸蜀

十五年元宗出奔至扶風勉慰將士入蜀楊國忠妻子及虢國夫人走陳倉縣令薛景仙誅之殺賊將克

古今圖書集成
扶風城守安祿山遣高嵩以敕書綵繒誘河隴將士
大震關使郭英乂斬之

代宗大曆十年吐蕃寇隴州李抱玉馬璘等擊破之
大曆十三年七月天鼓鳴於岐山

德宗建中三年名朱泚入朝以張鎰爲鳳翔節度使
四年十月鳳翔將李楚琳殺張鎰降于朱泚初朱泚
鎮鳳翔遣將牛雲光戍隴州至是欲執留後韋臯以
應泚事覺出走

文宗太和九年以鄭注爲鳳翔節度使十一月注與
李訓舒元與謀誅宦官將親兵至扶風知李訓已敗
復還鳳翔監軍張仲清伏甲斬之滅其家僚屬皆死
開成三年美陽五色雲見

宣宗大中元年十一月十七日岐山縣周公廟靈泉
出賜名潤德泉

舊志唐咸通十四年詔自鳳翔迎佛真身於輦下相
傳云是釋迦文佛中指節骨長一寸八分瑩潔如玉
以小金棺盛之舊藏於鳳翔塔中按釋氏涅槃經云
如來於雙林滅度貯於金棺銀槨積旃檀焚之諸天

古今圖書集成
以八金剛分取舍利惟留四牙餘悉煨燼不知此骨何從而而有都門士庶奔走雲集自開遠門達於岐州車馬晝夜相屬飲饌盈溢路衢謂之無碍檀施在城坊曲舊迎真身社居人長幼旬出一錢自開成之後迄於咸通計其資積無算於是廣爲費用物價頓高茶米載以大車往往至於百兩他物豐盈悉皆稱是至京上與諸王親御城樓坊市以繒綵結爲龍鳳象之形紙竹作僧佛鬼神之狀幡花幢蓋之屬羅列二十餘里間之歌舞管絃雜以禁軍兵仗緇流梵誦之

聲沸聒天地民庶間有喜笑踴躍者有悲愴涕泣者真身以寶輦昇之居於內殿數月俄屬懿皇厭代密使送於鳳翔先是真身到城每坊十字街以甄壘浮圖供養妖妄之輩互陳感應或云夜中震動或云其上放光以求化資財因此獲利者甚衆及宮車晏駕諸坊浮圖一時拆毀有好事者密詢放光之由云以大雲母片窺者遠而望之則燦然有光乾符咸通中興善寺復有阿闍黎以教法傳授都下翕然宗之所居院金碧華麗器用盡是寶玉語人云焚香結坐每

古今圖書集成
告西方及遷化普照大師信者咸爲出涕朝士與中
貴多爲弟子出城之日縞素後隨受其法者不復思
理時務

僖宗廣明元年黃巢入長安帝趨駱谷鳳翔節度使
鄭畋謁於道次請畱鳳翔不得畋曰道路梗塞奏報
難通請得便宜從事畋還鳳翔召將佐議拒賊皆曰
賊勢方熾且宜從容以俟兵集乃圖收復畋曰諸軍
勸畋臣賊乎因悶絕仆地不能言會巢使者至監軍
與之燕樂奏將佐已下皆哭使者怪之幕客靳備曰

以相公風痹不能來故悲耳民間聞者莫不泣畋曰
吾固知人心尙未厭唐賊授首無日矣乃刺指血爲
表遣使詣行在召將佐諭以順逆皆聽命刺血與盟
完城塹繕器械訓士卒密約鄰道皆許諾發兵時禁
軍分鎮關中者尚數萬畋使人招之皆至軍勢大振
巢遣人齎詔召畋畋斬之

二年正月鳳翔等處地震岐山復崩

中和元年三月巢遣尚讓寇鳳翔鄭畋使司馬唐弘
夫伏兵要害自以兵數千陣于高岡賊以畋書生輕

古今圖書集成
之鼓行而前伏發大敗于龍尾坡斬首二萬級弘夫乘龍尾之捷進薄長安黃巢率衆東走弘夫入長安軍士于城中大掠賊還襲之大戰長安中弘夫死焉冬十月行軍司馬李昌言將兵屯興平時鳳翔倉庫虛竭犒賞薄昌言因激怒其衆引軍還襲府城鄭畋登城謂之曰行軍苟能戢兵愛民爲國滅賊亦可以順守矣乃以畱務委之卽日西赴行在詔以畋爲太子少傅分司昌言爲鳳翔節度使

光啓元年十二月李克用進逼京城田令孜奉上奔

鳳翔克用還軍河中表請還宮令孜劫帝如寶鷄朱玫李昌符追逼車駕帝復走入大散關

三年三月車駕至鳳翔李昌符恐車駕還京雖不治前過恩賞必疎乃以宮室未完固請駐蹕府舍從之六月李昌符與天威都頭楊守立爭道相毆帝命中使諭之不止昌符遂擁兵燒行營守立與戰敗走保隴州詔遣李茂貞爲招討使討之八月李茂貞平隴州李昌符伏誅詔以李茂貞爲鳳翔節度使

昭宗景福元年李茂貞以兵攻興元取其地自請鎮

古今圖書集成
之詔徙茂貞山南西道節度使茂貞欲兼得鳳翔不奉詔表辭不遜帝怒決策討之命杜讓能專掌其事讓能諫之不聽而以避事責之讓能泣曰臣豈敢避事顧時有未可勢有不能恐他日徒受晁錯之誅不能弭七國之禍也乃命讓能留中書計畫調度月餘不歸以覃王嗣周爲京西招討使討李茂貞帥軍三萬軍于興平茂貞等進逼興平禁軍皆望風逃潰茂貞等乘勝進攻三橋陳於臨臯驛表讓能罪請誅之帝不得已貶讓能爲雷州司戶茂貞勒兵不解遂殺

杜讓能以茂貞爲鳳翔兼山南西道節度使茂貞於是盡有鳳翔興洋秦隴十五州之地
乾寧元年春正月李茂貞入朝陳兵自衛數日歸鎮
二年五月茂貞與韓建王行瑜舉兵犯闕李克用討之乃退

三年秋七月茂貞舉兵犯闕上如華州克用發兵入援冬十月以孫偓爲鳳翔行營招討使討茂貞茂貞上表請罪韓建復左右之竟不出師

天復元年二月進李茂貞爲岐王十一月韓全誨等

古今圖書集成
劫帝如鳳翔朱全忠引兵至鳳翔城東而還

二年四月全忠復圍鳳翔茂貞自將與全忠戰于虢縣之北大敗全忠進軍鳳翔城下朝服向城而泣曰臣但欲迎車駕還宮耳不與岐王角勝也遂爲五寨環之九月茂貞攻朱全忠營敗績全忠遣使奉表迎車駕十一月保大節度使李茂勳引兵救鳳翔朱全忠遣兵取鄜坊茂勳降

二年帝在鳳翔十一月丁巳日南至夜驟風有鳥數千迄明飛噪數日不止自車駕在岐嘗有鳥數萬棲

殿前諸樹時人謂之神鴉

三年正月李茂貞殺韓全誨等帝幸朱全忠營遂發鳳翔茂貞請以子侃尚平原公主蘇檢女爲景王妃以自固帝皆從之十月茂貞李繼徽舉兵逼京畿昭宣帝天祐元年六月李茂貞王建李繼徽合兵討

朱全忠

後唐閔帝應順元年春以李從珂爲河東節度使命洋王從璋權知鳳翔從珂舉兵反唐遣兵討之官軍降潰從珂稱帝復以李從曠爲鳳翔節度使

古今圖書集成
後晉高祖天福二年鳳翔節度使李從暉獻白兔二
天福三年鳳翔節度使李從暉厚文士而薄武人愛
農民而嚴士卒由是將士怨之會發兵戍西邊作亂
剽掠從暉發帳下兵擊之亂兵敗走至華州鎮國節
度使張彥澤邀擊盡誅之

七年四月關西諸郡蝗

後漢隱帝乾祐元年春正月漢遣將軍王景崇經略
關中侯益復請降赴聖壽節上壽帝以王景崇爲鳳
翔巡檢使景崇至鳳翔侯益尚未行景崇以禁兵分

守諸門或勸景崇殺益景崇猶豫未決益聞之不告
景崇而去景崇悔之益入朝盛毀王景崇言其恣橫
景崇不自安會詔遣供奉官王益如鳳翔徵趙匡贊
牙兵詣闕趙思綰甚懼景崇因以言激之至長安據
城作亂景崇諷鳳翔吏民表已知軍府事朝廷患之
以趙暉爲鳳翔節度使王景崇爲邠州留後景崇遷
延不之邠州閱集鳳翔丁壯詐言討趙思綰仍牒邠
州會兵至是降蜀亦受李守貞官爵蜀遣兵援鳳翔
漢人邀敗之王景崇殺侯益家屬七十餘人益子仁

矩在外得免趙暉圍景崇於鳳翔景崇遣兵出西門
趙暉擊破之遂取西門景崇退守大城暉塹而圍之
數挑戰不出暉潛遣千人擐甲執兵效蜀旗幟循南
山而下令諸軍聲言蜀兵至矣景崇果遣兵數千出
迎之暉設伏掩擊盡殪之自是景崇不敢出蜀主遣
安思謙將兵救鳳翔僕射母昭裔諫不聽思謙遣申
貴將兵二千設伏于竹林以兵數百壓寶鷄而陳漢
兵逐之遇伏而敗蜀兵進屯渭水漢益兵五千成寶
鷄思謙引還王景崇告急於蜀蜀主命安思謙再出

兵救之進屯散關敗漢兵趙暉告急於郭威威自往
赴之蜀兵食盡引還

二年十二月漢趙暉急攻鳳翔周粲謂王景崇曰蒲
雍已平蜀兒不足恃不如降也景崇曰善吾更思之
後數日外攻轉急景崇自焚死

後周世宗顯德二年五月遣鳳翔節度使伐蜀

湘山野錄宋雍熙二年鳳翔奏岐山縣周公廟有泉
涌舊老相傳時平則流時亂則竭唐安史之亂其泉
竭至大中年復流賜號潤德泉後又涸今其泉復涌

古今圖書集成
澄甘瑩潔太宗嘉之

府志仁宗皇祐五年三月扶風岐山大旱無禾

嘉祐五年扶風岐山旱甚歲饑

宋史歐陽修傳修知制誥奉使河東自西方用兵議者欲廢麟州以省餽餉修曰麟州天險不可廢廢之則河內郡縣民皆不安居矣不若分其兵並駐河內諸堡緩急得以應援而平時可省轉輸於策爲便由是州得存

澠水燕談錄秦武公作羽陽宮在鳳翔寶鷄縣界歲

久不可究知其處元祐六年正月直縣門之東百步

居民權氏濬池得古銅瓦五皆破一獨完瓦面徑四

寸四分面上隱起四字曰羽陽千歲篆字隨勢爲之

不取方正始知卽羽陽舊址也其地北負高原南臨

渭水前對羣峰形勢雄壯真勝地也武公之初年距

今千有七百八十八年武功游景叔方總秦鳳刑獄

摹刊于石置之岐陽憲臺之瑞豐亭以貽好事者

府志高宗建炎二年金人寇熙河都監劉惟輔逆擊

于新店破之隴右都護張嚴追戰五里坡敗死

按五里坡

古今圖書集成
在鳳翔縣
四十里

三年二月金兵由斜谷北去劉子羽謀邀之于武休不及撒離喝既回鳳翔遣十人持書招子羽子羽皆斬之十二月金兀朮陷和尚原

四年三月吳玠吳玠與金戰于仙人關大敗之是役也兀朮以下皆攜妻孥而來劉夔乃劉豫心腹本謂蜀可圖既不得逞度玠終不可犯乃還據鳳翔授甲士田爲久畱計不敢妄動

十年五月金兀朮撒離喝分道入寇復陷河南陝西州郡詔以吳玠節制陝西諸路軍馬時金人犯石鼻砦玠遣姚仲等破走之既而撒離喝使鶻眼郎君以三千騎衝玠軍玠使統制李師顏以驍騎敗之虜先于扶風築城既敗入城據守官軍攻拔其城獲三將及女真百七十人撒離喝怒甚自戰百通坊仲力戰破之撒離喝還鳳翔由是金人不敢度隴九月楊政復隴州及破岐下諸屯尋詔班師還鎮
十二年八月和議成割和尚原方山原以畀金以大散關爲界

古今圖書集成
三十一年金主亮入寇遣徒單合喜爲西蜀道行營
兵馬都統制由鳳翔取大散關

三十二年閏二月吳璘將王彥以神臂弓射金師却
之又遣別將彭青至寶鷄渭河夜劫橋頭大寨乘勝
復秦隴洮州大散關分兵守和尚原金人走寶鷄十
二月金人以重兵扼鳳翔爭吳璘新復十三州時議
棄三路遂詔班師金於是置天興軍

寧宗嘉定十六年正月蒙古木華黎攻鳳翔晝夜苦
戰四十餘日不下

理宗寶慶二年七月蒙古自鳳翔趨京兆

紹定元年蒙古圍金鳳翔夏四月克之

恭宗德祐二年星隕如雨潤德泉涸

元世祖至元十七年潤德泉復湧水如故

成宗大德十一年地震岐山崩

仁宗時五色鳥巢於周公廟白楊樹上

延祐四年扶風縣尹張廷祐亭圃生嘉禾邑人肖刻
於石

泰定帝泰定四年八月鳳翔興元地震

順帝至正二年潤德泉涸

二十四年秋九月潤德泉復湧出

二十七年天鼓鳴是歲李思齊部將李克彝據岐山
明洪武二年三月兵入潼關攻元李思齊營思齊棄
輜重奔鳳翔李克彝據岐山任從政據隴州大將軍
徐達遣馮得勝進攻鳳翔思齊懼率所部奔臨洮四
月大將軍至鳳翔進兵克隴州西陲底定
成祖永樂六年八月丙申隴州夜有星大如盞青白
色尾跡有光出西方游行井度

宣宗宣德六年四月隴州大水廬舍學宮漂沒

憲宗成化十一年潤德泉涸

二十年二十一年二十二年郿縣岐山扶風等縣連
歲大旱流亡殆盡斗米萬錢人相食死者載道

孝宗弘治五年三月隴州甘露降

十五年九月十五日岐山雷雨交作潤德泉復出
十七年郿縣雷雹傷稼

武宗正德二年岐山扶風大旱民皆流移

十四年潤德泉久涸復湧出

古今圖書集成
世宗嘉靖七年岐山扶風郿縣大旱斗米千錢民相食次年郿縣飛蝗蔽天

二十六七年大饑

三十二年岐山扶風大旱民饑流移殆盡

三十四年十二月地大震有聲如雷山移數里平地拆裂水溢出鳳翔等處郡邑城多陷沒死者數十萬人公署房舍傾圮無存是年郿縣大饑

穆宗隆慶二年五月麟遊縣雨雹禾盡偃

神宗萬曆元年麟遊蟲食麥苗盡扶風有星隕于永

平里入地三尺化爲黑石掘出尚熱

十三年至十五年鳳翔岐山扶風麟遊等縣俱大旱斗米千錢民多逃移饑死

十六年潤德泉涸岐山扶風大熟麟遊大祲民死幾盡

十七年鳳翔始熟岐山扶風俱大熟

二十三年鳳翔有虎入城西北隅八月郿縣地震

二十七年扶風大饑

二十九年麟遊雨雹有大如牆者彌旬不消

三十八年麟遊自八月不雨至次年四月盡始微雨
民疫死甚衆

三十九年扶風秋大熟
四十年三月扶風雨雹殺禾

四十四年麟遊蝗蟲蔽天而下鄉民焚香告天哭聲
震野

熹宗天啓二年八月鳳翔地震有聲麟遊屋倒山崩
五日方定

四年潤德泉復出

崇禎元年春流賊劫曲鄉羅牛角家為鳳邑被賊之
始

二年扶風旱疫

三年鳳翔西街民家猪產象隨死

四年四月扶風霖雨傷禾人相食地震從西而東南

五年隴州大饑

六年鳳翔夏旱秋無禾冬大饑人食樹皮俱盡擣石
為麪食之頭面發腫死扶風斗米千文遺棄嬰孩滿

於道路

古今圖書集成
七年扶風大旱麥苗盡枯人至掘其根以食兼嚙樹皮死者相藉十一月地大震流賊大肆猖獗進士孫鵬射殺其日經略陳奇瑜忌之誣以擅殺逮赴京師下獄在廷條瑜縱寇鵬始得免

八年鳳翔雨灰三日麟遊大饑賊大掠城野九月扶風寇至城陷屠戮焚掠境無人跡庠生屈學會戰死陳村鎮

九年鳳翔府學前有鳥數千集地爲方陣首皆外向齊若引繩麟遊流賊焚劫殺掠民不堪命

十一年潤德泉涸鳳翔秋無禾麟遊扶風秋大旱飛蝗蔽天草木禾苗俱盡

十二年鳳翔飛蝗蔽天秋無禾是年夏有星隕於居民袁畫家去地尺許滾滾不定狀如金之在冶良久忽起四五丈從南城飛去光照數十里又多大鼠纍纍成群入人家食小兒入牛腹食牛臟腑岐山扶風麟遊天鳴有光遺蝻遍野食麥禾

十三年鳳翔等縣大旱饑流移載道死者枕藉次年大饑疫起居民闔室俱斃野無人烟

古今圖書集成
十四年春麟遊饑饉大疫死者枕藉夏大熟野麥旅
生無人採食

十五年渭河清半月東至郿縣界西至鳳翔平陽鎮
三月鳳翔扶風麟遊陰霾雨土日無光冬鳳翔西街
民家猪產子二首一身背上復有四蹄
十六年秋鳳翔鸚鵡大至棲城上樹皆滿旬日乃去
冬麟遊有流星隕於東南聲如雷震扶風遍地生鼠
有大如猫者十月軍門孫傳庭敗死汝郟潰兵西奔
至鳳翔大擾賊乘勝趨潼關破西安渠黨劉體純等

二十八日至鳳翔屯東關十一月朔城遂陷

鳳翔府部雜錄

偃曝談餘陳貞父云寶鷄有尹喜故宅張三丰丘長春馬丹陽王重陽劉綱樊夫人秦弄玉仙跡往往而在第虎豹熊羆時出伺人有獨角獸樵者見其臥林間或搏虎而食輒餘其半山家每得殘虎以飽縣苦無酒隴酒甜桑落酒有毒市中酒帘比屋競欲其刺口釀以烏頭纔沾舌舌破不可飲也

嘗見鬻皮於市似猿猴而長尾尾色紅問之曰狨也去來林間如飛猿猴之族千百爲羣出采山核狨至

古今圖書集成
莫不俯首帖服不敢張目視狻歷視其肥腴者取小石或落葉識其首噉且飽狻臥或他去猿狻散走其首有識者惴惴待牙吻無動其黠者乘間竊取首所識移之鄰己得脫去而鄰代之矣

熊得人輒搔人喉若腋令笑人仆舌舐面血以爲快人屏氣陽死乃棄去還視之再三人蘇欲起逃去追而扼之山民習其狀能脫於死

寶鷄縣南山有巨蟒噓氣成雲人入其中輒僵懸崖空中蜂國之家爲木箱蜜其裏梯而上之置空中蜂

移國之以爲利嘗有伐樹樹空中得蜜石許者深山大林多無人境故見聞與南不類也

舊志東坡云少官鳳翔行山求邸見壁間有詩曰人間無漏仙兀兀三杯醉世間無眼禪昏昏一覺睡雖然沒交涉其奈路相似相似尚如此何況真個是故其海上濁膠有妙理賦曰常因旣醉之適方識此心之正然則此老言人心之正與孟子言性善何以異哉

鳳翔府部外編

舊志秦穆公寢疾七日而寤寤之日告公孫支與子輿曰我之帝所甚樂吾所以久者適有學也帝告我晉國將大亂五世不安其後將霸未老而死霸者之子且令而國男女無別公孫支書而藏之秦識於是出矣而後世皆曰秦穆公上天

搜神記秦穆公時陳倉人掘地得物若羊非羊若猪非猪牽以獻穆公道逢二童子曰此名爲媚嘗在地食死人腦若欲殺之以柏插其首媚曰彼二童子名

爲陳寶得雄者王得雌者霸陳倉人舍媚而逐二童子童子化爲雉飛入平林陳倉人告穆公穆公發徒大獵果得其雌又化爲石置之汧渭之間至文公時立陳寶祠其雄飛至南陽今南陽雉縣是其地也每祀陳寶時有赤光長十餘丈從雉縣來入祠中有聲殷殷如雄雉其後光武起於南陽

鳳翔縣志秦穆公出狩天震大雷下有火化爲白鶴銜丹書集公車曰秦伯霸

韋自東其人義烈勇壯貞元中嘗遊太白山棲止投

將軍莊一日偕眺山谷見微徑有舊行迹問之投曰山頂有殿宇蓋開元中萬迴師弟子建之有二僧居此爲野叉所食今絕迹三年無人敢窺焉自東聞之怒曰野叉何類而敢噬人今夕必挈其首力阻不顧仗劍而往至一精舍戶大敞履烏衾枕儼然而塵埃凝積其上佛堂內細草茸茸似有巨物偃臥者四壁尚有包炙之餘自東乃憶前言不謬度未至拔柏根去枝爲挺以石佛反扃夜半野叉挈鹿而至怒扃鑄奮首觸戶折其石佛而踣於地自東持挺搃其腦再

舉而斃曳入復局以伺頃有至者哮吼觸戶亦踣闕外又搗而斃之自東乃掩關烹鹿而食及明斷野叉首并挈餘鹿以歸衆皆駭異聚觀如堵有一道士自稱嘗遇至人配合靈藥據洞修之有日矣而數被妖魔就爐擊觸藥幾飛散懇自東仗劍衛之自東許諾往當太白高峯至煉丹石室佇立以俟丑後有數丈巨虺金目雪齒毒氣氤鬱蜿蜒欲入自東以劍擊之似中其首俄若輕霧化去頃之又一妖艷女子執芰荷之花緩步而來亦以劍拂之若雲氣而滅將曙復

一道士乘雲駕鶴導從甚嚴來勞自東并遺之詩三秋稽顙叩真靈龍虎交成金液成絳雪旣凝身可度蓬壺頂上綵雲生自東詳詩意爲道士師也遂釋劍禮之俄突入藥鼎爆裂更無遺在道士痛哭自東悔恨自咎姑以泉滌器飲之自東後更有少容適南嶽與道士莫知所之

貞元二年李晟復京師朱泚以千餘人西走昏忽迷路不辨南北問路於田父田父曰豈非朱太尉耶源休止之曰漢皇帝田父曰天不長凶地不生惡蛇不

古今圖書集成
爲龍鼠不爲虎天網恢恢去將安適泚怒將殺之忽失所在

王皮者居鳳翔城外八九里許盛暑入城買皮料歸憩道旁樹下有二卒前來狀貌奇怪問曰汝王皮與王疑懼遂以實對卒曰陰府攝汝王曰某生平無大過惡望賜矜憐卒不諾又曰容到家與妻子一別可乎卒乃諾將及門卒力挽之不能入王大叫比妻子來已仆地氣絕矣然胸中微熱經宿未敢蓋棺王隨卒至一所儼若王者之庭儀衛吏隸無不備問曰汝

爲白起偏將坑趙降卒四十萬知其罪否王曰某傭工平生不曾讀書不知白起爲何人坑降卒爲何事於是令王起凡再歷二庭問亦如之乃反引至一大池邊取池中泥塗其胷寒氣凜冽洞腹透背王卽悟曰某已記前身事矣復引至原問第三殿王告曰某曾爲白起偏將殺降卒時某曾力諫不從頃間引一荷鍬校者跪王側王認得白起而形骸骨立蓋因久囚故也起見王曰子來矣予復何言方招承庭史引王還第一殿檢錄陽壽尚有若干年卽命原攝卒引

古今圖書集成
至原憩樹下一推而王乃蘇妻子親鄰且驚且喜扣問備言其故有傳之京師者差進士崑哲篤來鳳翔覆查果實

後唐潞王從珂起鳳翔共事凡五人客將房暲喜鬼神巫祝之說有瞽者張濛自言事太白山神神魏崔浩也其言吉凶無不中初愍帝卽位徙王爲北京畱守王疑惑而節度判官韓昭蔭等勸王反暲使濛問於神神傳語曰三珠并一珠驢馬沒人驅歲月甲庚午中興戊己土暲不曉其義使問濛濛曰神言如此

我能傳之不能曉也王以濛爲館驛巡官王將反憂兵食不足使暲問濛濛傳神語曰王當有天下可無憂乃移檄馳告諸鎮皆不應獨隴州防禦使相里金遣其判官韓文遇計事王大喜而孔目判官劉延朗率調城中民財給軍及王思同率諸鎮圍鳳翔王懼又遣暲問神神曰王兵少東來兵所以迎王也已而東兵果叛降於王王入京師卽位受冊明宗柩前冊曰維應順元年歲次甲午四月庚午朔王回顧暲曰張濛神言豈不驗哉由是暲益見親信而專以巫祝

用事

曰恭愍王甲午歲大甲午四月廿九日庚子回國
 東兵果戡剽效王王入京禍昭分受國即宗祚前冊
 又皇高問輔輔曰王兵少東來兵西以政王忠子前
 率國姬中刃叔餘軍又王恩回率前國國以解王
 蓋其供官韓文此情事王大喜而王曰終官陸國
 其以多燃也
 其命不弘始高問新義韓輔輔曰王欲許夫不許
 殊論終之不論舞也下以新義前韓國王欲許夫



